

Mfalme Anakuja,

Basi mambo hayo yanzapo kutokea, changamkeni, mkaviinue vichwa vyenu, kwa kuwa ukombozi wenu umekaribia. Luka 21:28.

Kristo alikuwa amewataka watu Wake kuzifuatilia ishara za ujio Wake na kufurahia kuona viashiria vya ujio wa Mfalme wao. “Basi mambo hayo yanzapo kutokea,” alisema, “changamkeni, mkaviinue vichwa vyenu, kwa kuwa ukombozi wenu umekaribia.” Aliwaonesha wafuasi Wake miti iliyokuwa ikichipuka wakati wa majira ya kuchipua na kusema: “Wakati iishapo kuchipuka, mwaona na kutambua wenyewe ya kwamba majira ya mavuno yamekwisha kuwa karibu. Nanyi kadhalika, mwonapo mambo hayo yanaanza kutokea, tambueni ya kwamba ufalme wa Mungu ukaribu” (Luka 21:28, 30, 31).

Lakini kwa kuwa roho ya unyenyekevu na kicho ilikuwa imetoweka kanisani na badala yake kanisa likaingiwa na kiburi na ibada ya desturi, upendo kwa Kristo na imani kwa ujio Wake vilikuwa vimepoa. Kwa sababu ya kuipenda dunia na anasa zake, watu waliodai kuwa wa Mungu walipofushwa hata wakashindwa kukumbuka mafundisho ya Yesu kuhusu ishara za ujio Wake. Fundisho la ujio wa pili lilipuuzwa; Maandiko juu yake yalitiwa giza na tafsiri potovu, hadi, kwa sehemu kubwa, likapuuzwa na kusahuliwa. Hasa katika makanisa ya Amerika. Uhuru na starehe ambayo matabaka yote ya jamii yalikuwa nayo, tamaa kubwa ya mali na starehe, kuzama katika matumizi ya muda mwingi kutafuta fedha, shauku ya kupata umaarufu na madaraka kwa haraka, vilivyoonekana kuwezekana kwa watu wote, waliwafanya watu kuelekeza matakwa na matumaini yao kwa vitu vya maisha haya na kuweka mbali katika wakati ujao siku ile kuu, wakati utaratibu wa mambo uliopo sasa utakapotoweka.

Mwokozi alipowaeleza wafuasi Wake katika ishara za kurudi Kwake, alitabiri juu ya hali ya kurudi nyuma kiroho itakayokuwepo muda mfupi kabla ya ujio Wake wa pili. Kutakuwepo, kama ilivyokuwa katika siku za Nuhu, shughuli na pilikapilika za mambo ya kidunia na utafutaji wa anasa—kununua, kuuza, kupanda, kujenga, kuoa na kuolewa—pamoja na kumsahau Mungu na kusahau kuhusu maisha yajayo. Kwa watu wanaoishi katika nyakati hizi, maelekezo ya Kristo ni: “Basi, jiangalieni, mioyo yenu isije ikalemewa na ulafi, na ulevi, na masumbufu ya maisha haya; siku ile ikawajia ghafula, kama mtego unasavyo.” “Basi, kesheni ninyi kila wakati, mkiomba, ili mpate kuokoka katika haya yote yatakayotokea na kusimama mbele za Mwana wa Adamu” (Luka 21:34, 36). (Pambano Kuu uk. 255, 256).

Tunapaswa kuishindania kwa bidii imani waliyokabidhiwa mara moja watakatifu... Sasa tunapaswa kuungana, na ... kuandaa njia kwa ajili ya Mfalme wetu ajaye. Na tuzidi katika maarifa ya ile kweli, na kumpa heshima na utukufu Kwake ambaye Yeye na Baba ni wamoja. Hebu tutafute kwa bidii kupakwa mafuta ya Kimbingu, Roho Mtakatifu (Medical Ministry, 22).